

Adattar l'armada a la nova situaziun da smanatscha

100 000 umens tanschan

DA LUCAS DEPLAZES / ANR

■ **Ier ha il cussegl dals chantuns cumenzà cun il svilup da l'armada. Quella duai vegnir reducida sin 100 000 persunas e pudair reagir pli svelta sin la nova situaziun da smanatscha.** En sia missiva al parlament propoia il cussegl federal da reducir l'armada sin 100 000 persunas e da fixar il dumber da dis da servetsch sin tschintg milliuns l'onn. Per rinforzar l'efficacità, la flexibilitad e la forza da cumbat duai l'armada disponer d'in armament modern e d'ina organizaziun che pussibilescha ina mobilisaziun pli svelta. Il cussegl federal propoia da reducir ils dis da servetsch per las singulas persunas da 260 sin 225 dis e da reducir la scola da recrut da 21 sin 18 emnas. Ils curs da repetiziun duain cuzzar be duas emnas. Per segirar la finanziaziun vul il cussegl federal metter a disposiziun a l'armada per ils onns 2017–2020 la summa da 19,5 milliardas francs. Per promover la pasch en l'exteriur propoia il cussegl federal da metter a disposiziun dapli meds finanzials e persunals.

Incumbensa da l'armada

L'armada duai impedir la guerra e gidar da mantegnair la pasch. Ella duai defender la patria e sia populaziun e garantir la suveranità en l'aria. Plinavant duai l'armada er contribuir a la promoziun da la pasch sin il mund en connex cun las stentas internaziunalas. L'armada duai sustegnair las autoritads civilas en cas che lur agens meds na tanschan betg, principalmain en cas da smanatscha da la segirtad interna ed en cas extraordinaris. Differenzas existan tar la dumonda davart il sustegn da la polizia chantunala cun forzas militaras.

Reagir sin novas smanatschas

Alex Kuprecht, (pps/SZ), il president da la cumissiun, fa attent che suenter 20 onns cun revisiuns parzialas saja uss necessari da

reveder las premissas da basa per l'armada e da las adattar a las novas situaziuns da smanatscha. Il president fa er allusiun a la situaziun precara en il Proxim Orient, ma er en diversas regiuns da l'Europa. En vista a la nova situaziun da periclitaziun e las acziuns da terrorissem saja necessari da pudair reagir pli svelta e da dar ina clera risposta sin la midada da la situaziun. Perquai saja da gronda muntada da procurar per ina mobilisaziun pli svelta. Tenor la cumissiun duai l'armada pudair mobilisar 35 000 schuldads entaifer 10 dis. Kuprecht fa attent che la populaziun saja s'exprimida en diversas votaziuns en favur da l'armada da milissa ed accentuescha la muntada da francar la missiun da l'armada er en las regiuns.

La cumissiun propoia da metter a disposiziun a l'armada 20 milliardas francs per ils onns 2017–2020. Impurtant saja plinavant d'adattar la scolaziun militar a la nova situaziun da smanatscha, principalmain per il cader. Ella vul mantegnair las trais emnas per ils curs da repetiziun, quai che saja en l'interess da la scolaziun ed er da l'economia. Ils curs da repetiziun vegnan reducids da sis sin tschintg. La scola da recrut duai vegnir reducida da 21 sin 18 emnas e vegnir organisada duas giadas l'onn. Cun las propostas da la cumissiun vegnan ils dis da servetsch reducids sin 240 empè da 225 tenor il cussegl federal. Vinavant pon ins absolver il servetsch militar en in toc. Talas persunas na fan betg part da l'effectiv da l'armada. Ellas pon vegnir mobilisadas en cas d'urgenza. L'effectiv da l'armada duai vegnir reduci sin 100 000. Objects che l'armada na dovria betg pli duain vegnir liquidads. Tenor il parairi da la cumissiun duain las duas brigadas mecanisadas vegnir rinforzadas cun ina brigada supplementara.

Cun 35 vuschs cunter trais ha il cussegl dals chantuns decidi d'entrar en la materia. La discussiun da detagl è prevista per gievgia proxima, ils 12 da mars.